

Handwritten Chinese characters in seal script, likely a library or collection stamp.

山東曹州府曹縣鄉土志

歷史

曹縣舊名盤石鎮明洪武二年徙曹州治於盤石鎮四年
改州為縣屬濟甯府正統十一年改屬兗州府曹州
國朝因之雍正十二年陞曹州為府縣仍屬焉

虞夏屬豫州之東北隅

商建都為北亳係王畿之地故縣南十八里湯陵在焉

周為曹之南境宋之北境春秋隱公七年戎伐凡伯於楚

邱今縣東南有楚邱故址僖公十九年宋人曹人邾人

盟於曹南今縣東霸王盟壇在焉戰國報王二十五年

齊楚魏滅宋三分其地齊得宋之濟陰東南為楚邱已

氏邑

秦仍已氏舊邑屬碭郡

西漢為薄縣地屬兗州山陽郡又為定陶縣地屬兗州濟

陰郡又為已氏縣地屬豫州梁國

東漢薄縣改屬豫州梁國已氏縣改屬兗州濟陰郡

三國魏因東漢

晉因魏改薄縣為蒙縣



後魏以濟陰郡置西兗州又置沛郡已氏隸焉
北周改西兗州為曹州

隋改置濟陰縣於左山之陽為曹州濟陰郡之附郭已氏
縣改為楚邱縣屬宋州梁國

唐濟陰縣屬河南道濟陰郡楚邱縣屬宋州睢陽郡
後梁濟陰縣仍為曹州附郭楚邱縣屬宣武軍

後唐濟陰縣仍舊楚邱縣改屬歸德軍
後周濟陰縣仍舊

宋濟陰縣仍舊楚邱縣屬應天府

金濟陰縣仍舊世宗大定末河決徙城於北七十里乘氏
地縣仍舊名附郭實濟陽縣地楚邱縣屬歸德府

元因金之州縣北徙而盤石鎮北皆屬曹州濟陰縣境楚
邱縣亦改屬曹州

明洪武元年省濟陰入曹州以水患移州治於安陵二年
又以水患移州治於盤石鎮而以楚邱縣省入蓋自春
秋至明兩邑始合為一四年改州為曹縣屬濟甯府十

八年改濟甯府為州縣隨州屬兗州府正統十一年巡
撫山東大理寺少卿張驥奏河北之民差徭不便

特河行
左山下



乃於古曹故城舊乘氏地復置曹州而以曹縣隨曹州
屬兗州府

國朝因明至雍正十二年陞州為府縣仍屬焉

政績錄 由建置曹縣叙起

明

范希正字以貞正統間知縣事蒞任即募民輸粟數萬石
使有操行者收積備荒後值大旱全活者甚衆巡撫張
驥善其能聞於朝尋復設曹州薦希正為營建事畢陞
曹州知州因家焉

趙景鸞正德年知縣事時護城隄壞議更築之民初不悅
鸞曰民難與慮始可與樂成遂違衆舉之明年河決人
畜漂沒縣城以隄堅保全人始感服

薛侃字秉直由吏員以才能擢知縣事先是滕縣糧差半
移於曹遂以困弊乃力請以原額歸滕民大感悅在曹
四年恩威並著民稱薛青天

王圻號洪州嘉靖乙丑進士為御史劾新鄭左遷知縣事
萬曆三年蒞任時差糧不均民不勝其擾乃為免役法
名一條編按地丁派銀納官一切差徭盡由官雇租既



有定而庸調不煩著為令甲闔邑稱便

孟習孔字古徒萬歷乙未進士乙巳蒞縣任本境自王公
圻平役之後法火生弊猾民與吏書表裏為奸公廉得
其情乃請於上臺一切以地丁當差不論戶則名一串
鈐法以救條編之弊詳見賦役志

劉不溢字謙甫萬歷癸未進士蒞曹二載吏畏民懷卸篆
歸卒於旅次百姓為作佛事幡幢相屬送之出境

李支揚萬歷丁未進士戊申蒞縣任初本境苦盜下車之
日即曰弭盜之方不在斧鉞乃召積年盜渠貸其死而
任之有警責以緝捕期年戶犬不驚在任五載多所建
修立五經書院

錢達道萬歷間知縣事建詢瘼軒修尊經閣政績卓著

張慎言字金銘萬歷庚戌進士癸丑蒞縣任本境原有社
穀下車力勸推廣歲饑各方設粥廠以賑飢民單騎臨
視親嘗其粥角巾布衣援公座守者不知其為縣令也
曰令且至相公何不解事乃爾欲曳之哉而從者至乃
叩頭請罪徐曰汝何竟辱相公耶薄答之在任四年以
治行第一擢浙江道御史以掌批魏璫遣戍甘肅怡然

自適懷宗朝超擢刑部侍郎甲申江南擁立宏光將相
恣睢直道不容棄職入山以終

曹守勲萬曆丙辰進士知縣事愛民如子罪疑惟輕胥吏
作奸毫不假借時遼左構難軍興旁午賦役議增曰姑
緩之吾不忍重累此皮盡之黎也凡大徭役必力請得
緩而後已

鄒魯宏治丙辰進士有文學多才能蒞政明允人不能欺
纂修縣志人服博雅建修衙署人不苦勞邑人頌之

霍達由進士於崇禎八年知縣事折獄明允重修城垣四
旬工竣邑人德之建祠於迎恩門內

曹誠由監生任邑主簿歲饑力請當道賑之不允度有羨
粟千石不待報散於民棄位去瀕行火其案曰毋累百
姓也入名宦祠

劉讓永樂間任典史德彼於曹民懇留之銓部坐以久任
在官十六年瀕歸行李蕭然百姓餞送有垂涕者入名

宦祠

江元由舉人於成化間任邑學教諭通五經尤精於易監
製祭器悉倣古制作銘識之詳學校志入名宦祠



鄭敬道由舉人於正德三年任邑學教諭剛正嚴毅量才
講授士風丕振科第輩出入名宦祠

劉三省萬曆間任邑學教諭崇禎十三年舉入名宦祠

國朝

門可榮康熙十年知縣事力剔弊竇胥徒憎服行稅全革
勸民息訟事無株連鄉間終年不覩一硃字票不見一
青衣吏邑素苦河患蒞任明年河南徙雨雹皆在城郭
空處飛蝗蔽野皆覓草食之嘉穀一莖五穗冬有虎四
隻望境駭遁人稱濟陰五奇曰雹不傷禾蝗不食稼虎
不入境黃河遠徙穀莖五穗

朱琦康熙二十一年蒞縣任修黌宮葺湯廟開水道懇荒
田訟庭如水苞苴路絕歲饑捐廉煮粥賑濟活飢民萬
餘

臧眉錫進士知縣事在任三年士民懷畏尋致麥秀雨岐
之瑞

姚國旃嘉慶十八年秋白蓮教匪乘間入城嚮晨進署公
罵賊不屈死眷屬殉難者二十七人署前建立專祠以
時祭饗



楊雲漢駐防千總嘉慶十八年白蓮教乘夜入署公隻身
與賊戰斃賊數名力竭捐軀眷屬兵丁殉難者二十餘

人附入姚公祠

兵事錄

由本朝敘起

順治五年戊子七月叛賊李化鯨陷曹城連破曹州定陶
城武等城稱偽忠義王據曹城為巢穴化鯨本城武人
寓居於曹犯法被執充東道章于天愛其藝勇釋而任
之由是結納無賴四方綠林之輩交通聲援潛蓄異謀
知縣高元美嘗發其奸謀反遂決至是城陷元美被害

總河楊芳與濟甯道譚天祐討平之

嘉慶十八年癸酉秋白蓮教匪入城知縣姚國旂死之千
總楊雲漢拒賊死之賊由北門出竄河南滑縣據守官
軍討平之

咸豐八年戊午八月皖匪張樂刑等由單縣城武席捲入
曹境十五日嚮午城陷知縣茅麓於七月因公赴省比
賊至城中惟有典史黃鈺千總解魁元暨紳團登城守
禦時承平日久倉卒不知所為城東門南有缺陷數丈
賊由此梯而入黃鈺解魁元皆逃生員沈汝霖死於南

城文童劉五瑞生員劉溥陳玉蒼皆死之教諭趙介福
罵賊死賊盤踞兩日十七日南去知縣回署逃亡者漸
集生員孫乾一歲貢朱世楚等糾合城團將城之缺陷
者一律修補為守城之備四鄉稍有入城避亂者候選
守禦所袁煇糾合鄉團會同定陶歲貢劉瑞玉廩生許
長春呈明都察院籲懇 奏准修築北岸大隄為守禦
之備於九年二月杪開工隄南挑濠抵夏秋始竣工九月
皖匪自考城流通集越隄而北擾掠縣西北境鄉團合
擊之袁煇暨監生劉興義生員倪鳳來千總李真若相

繼戰歿奉 旨各賞雲騎尉世職十一年辛酉鄆鉅土

匪擾及本境荷澤匪渠郭秉鈞劉潛等暨定陶匪渠焦
國昌相繼侵掠本境由是本境賊匪接踵蠱起匪渠董
執信據魏灣寨孔廣潤據普連集寨惟東南一隅賊匪
尚少其餘皆無安土鄉民避居城寨野無居民麥秋失
耕九月勝營鄭勤堂率勇三百人來援駐黃官寺夜被
賊劫全軍覆沒自是賊衆在西城外巡邏劫擾幾無虛

日知縣靳昱夜宿城樓數月不急署內廢炊時貸諸紳
團邑城危如累卵十一月杪勝營遊擊王天保率勇五

百人夜由東門入城稍作聲援人心頗定十二月初僧
忠親王大軍臨境賊望風駭遁渠魁南竄與皖匪合其
餘或投誠或潛匿同治元年僧帥席捲南征剿撫並用
邑境肅清

同治四年乙丑四月僧帥追趕皖匪由西南竄入曹州府
西北境鏖戰數晝夜僧帥戰歿賊復遠竄五年四月皖
匪復竄入本境王呂集寨雙鋪集寨相繼失守劉軍門
銘傳與賊戰於城南賊敗東竄追擊於景山之西賊大
敗走自是不復犯曹境

光緒二十一年乙未本境土匪蜂起攻破青堦集寨肆行
劫掠二月抄攻陷河南睢州界之王喬寨聚嘯日衆聲
勢愈張邑城戒嚴邑侯王毓才大令電稟 撫轅蒙
飭委史鎮廷守戎星夜來援賊氛漸息即留駐防東關
數年頗資保障

三十二年丙午本境土匪復起招呼鄰境匪黨聚嘯日衆
邑侯李筱軒大令親率營勇特出進剿炎夏烈日冒暑
鏖戰自晨至暮倍極勞瘁旋因感受暑毒熱氣內攻卒
於官署百姓哀之繼任者為裴大令季和督率勇丁覘



漢
賊屯處往剽冬月嚴寒殊無退志賊蹤因之漸斂繼以
陸軍門大隊臨境明緝暗訪賊皆遠遁境內稍安
耆舊錄

曹曾字伯山濟陰人斲石為倉以藏書號曹氏書倉

孫期字仲成濟陰人少習京氏易古文尚書學者皆執經
壘畔以追之黃巾賊起相約不犯孫先生舍

隋

翟普林楚邱人事親孝父母俱終廬於墓側家畜一烏犬

隨之普林哀哭犬亦悲號有二鵲巢墓前柏樹每入其

廬馴擾不驚人謂孝行所感鄉里稱為楚邱先生

宋

邢昺字淑明濟陰人太宗時九經及第真宗置翰林侍講

學士以昺為之詔定三禮三傳孝經論語爾雅等疏

張齊賢字師亮冤句人三歲因亂徙家洛陽力學有遠志

太祖幸西都以布衣獻策馬前召至行宮條陳十事上

還語太宗曰我幸西都惟得一張齊賢耳以司徒致仕

卒諡文定



李紘字仲綱性方介有史材篤於交遊范仲淹被謫朝士
畏嫌無送者紘獨出郊餞之歷膺民社所至有惠政呂
夷簡蔡齊咸薦之仕至監察御史龍圖閣直學士知秦
州

李師中字誠之年十五上封事言時政舉進士歷知州縣
多異政平生志尚甚高進見多陳天人之際君臣大節
請以進賢退不肖為朝廷考課朝廷重之

侯義楚邱人家貧傭工事母母卒晝則負土築墳夜則哭
於墓側期年瓜異蒂同實木連理嘗有盜劫其衣服既
而知為義物悉還之

于令儀濟陰人長厚不忤物其鄰子夜盜其家令儀曰汝
素無過何苦為此迫於貧耳慨然贈以十千既去復喚
回曰汝貧甚夜負十千以歸恐為邏者所詰留之至明
始遣去盜者感悅卒為善士

元

張企誠字思敬世居曹南賦性純孝少喪母繼母徐氏無
子企誠與弟企賢事如所生父先卒徐氏老企誠兄弟
奉養彌謹至正間曹罹兵亂企誠用巨緆懸箕扛於

上扶母坐其中兄弟肩舁而行途遇盜詰知其情相戒
引去數次皆獲免值歲歉舉家待野菜度日惟供奉老
母不乏略無難色即比屋者不知其為繼母也入鄉賢

祠

王茂字伯昌盤庚村人博學能文仕至戶部尚書及明定
鼎避居福建詔徵不起後歸曹自號東村野叟著有東
村詩稿

明

李思孝親老家貧傭作以養親歿廬墓三年朝夕哭泣正

德庚辰河決侵墓鄉人勸還不從棲墓頂累日不食縣令
親詣墓所給以粟帛為立坊以表其門

孔誠孝弟性成治詩經淹貫百家邑人無少長賢愚皆知
為孔先生也宣德間有司屢薦皆以母老固辭不就

李秉字執中大黃人宣德乙卯解元丙辰聯捷進士歷官
至吏部尚書謚襄敏著有公餘雜詠江南雜詠雲中奏
議歸田集事載明史

王珣字德潤茂五世孫成化乙丑進士官至都御史巡撫
甯夏著邊備奏稿邊務奏稿各十卷應議奏稿南野詩

稿各二卷

石巍字民望安樂人成化辛丑進士王陽明嘗以年家子來謁為說乾知大始本旨曰知乃乾元初開之竅物皆資之以為始在人則先天一點真知也王大悟由是講學專以擴充良知為本浙學之盛實基於此著有小學家禮周易論語集旨學者稱為雪齋四集

王崇文字叔武珣三子官至右都御史巡撫保定著有兼山遺稿

王崇獻字季徵珣四子官至左都御史巡撫甯夏政聲卓著民懷其德咸謂有先公惠愛之風

路可由字子正官至右都御史巡撫遼東政績卓著著有遼東奏議一卷燼餘集二卷

王衮字補之茂之裔天性孝友慷慨好客承世祿之餘澤濟以勤儉遂貲冠一邑積而能散鄰里多被其惠嘉靖年河決灌城多所拯救邑南水涸村北積水叢沮巨蟒為害衮隻身乘小舟往捕蟒繞身三匝摘頭上金簪刺其吭而斃之巨患遂除學宮傾圮出五千金重新之河工方興出粟千石以餉河夫朱大司衡詳請奏開授執

金吾指揮使為建義士坊於署前賜好義彌篤四字

武圖功字言爾萬曆甲辰進士歷任州縣德政在民陞刑

部郎中疏請執審全活甚衆出守辰州遷辰沅道尋以

撫苗鎮華有濟變才改陝西按察司副使天啟朝以不

附魏黨被議落職退處大石潭號石潭居士家居凡四

年赴部補河間判遷刑部郎中旋改南刑部熹宗崩自

南都星馳哭臨旋里尋卒贈太僕寺卿

藍近任字仲遜萬曆己未進士以酒泉邊功晉亞中大夫

朱綱嘉靖丁未進士累官至中丞

扈永通字一貫嘉靖壬辰進士累官至河南布政使

胡宗沔字繼源萬曆二年以歲貢入太學上疏陳漕運事

宜詔下河臣核狀祭酒太倉王公以為國學有人當道

聞其諳於河務採其策修築太行隄以裨河防隄成詔

賜金八兩撫按表其門邑令王侍御圻創行條編法多

所贊成未仕卒

趙孺子字慧兒崇禎九年三月其母劉氏病篤聞街有割

股愈親之說不令父知割左股一嚙為食以進母食之

病愈公舉到官知縣霍達獎之曰慧兒年甫十二便能

便能

割股養親孝出天性以視衣冠而不知孝者相去何啻
天壤區其門曰至孝天成

國朝

黃立誠字居業總角能文章試為邑侯石公三畏所賞嘗
於逆旅得遺金三百兩候其人全界之順治五年李賊
陷城罵賊遇害士林惜之

武張聯字燦垣圖功之孫髫齡遊泮善談名理薦試銓部
第一授湖北武昌府通判實惠在民尤善決疑獄人比
之張釋之為廷尉云

袁振緒字燕昌康熙壬辰由附貢考取教習任湖南醴陵
縣知縣有幹濟才政聲卓著歷陞廣西永甯州知州松
桃同知南籠府知府

趙棧字敬夫雍正乙卯舉人任山西虞鄉縣知縣恤民疾
苦士民感頌卒於虞署旋里之日泣送者千百人

武若愚字智齋乾隆辛酉壬戌聯捷進士初任華陰縣知
縣有巨盜盤踞山谷人莫敢撓公率丁壯捕其魁散其
衆邑境肅清平生善判奇案時有青天之稱歷任渭南
縣知縣邠州知州陞西安府知府卒於府署兩袖清風



官囊蕭索陝人周之靈視始歸
人類

本境向無旗戶概屬漢戶除漢戶而外間有回戶散居於
城關集鎮亦有自成村落者其先係阿刺伯人入境以
來隸地方之版圖奉朝廷之教化士務誦讀農務耕桑
工商各安其業與齊民等視並無畛域之殊

戶口

本境按地納糧必憑戶按戶出丁則論口戶約計十二萬
五千六百九十有五口約計二十八萬七千四百九十
有七雖兵荒疾疫不無變遷而生齒日繁合漢戶回戶
丁口亦不形其減

氏族

孔氏係宣聖裔自甯陵遷曹現七十四代

姬氏係元聖裔自文昌遷曹現八十二代

冉氏係先賢仲弓裔道光三年冉毓銓由俊秀奉

旨陪祀現七十一代

仲氏係先賢子路裔咸豐三年仲緒恒由俊秀奉

旨陪祀現七十二代

